

03/07/2000

Semua pihak perlu jaga kestabilan Umno

Mohd Razali Tamren

SAYA adalah kakitangan Jabatan Kemajuan Masyarakat (Kemas), tertarik hati dengan ucapan Presiden Umno, Datuk Seri Dr Mahathir Mohamad ketika penggulungan perbahasan pada perhimpunan agung parti itu, baru-baru ini.

Antaranya beliau berkata, jangan letakkan agensi seperti Kemas, Jabatan Kemajuan Islam Malaysia (Jakim), Jabatan Penerangan dan jabatan lain saya untuk mempertahankan Umno, sebaliknya semua ahli dan pemimpin politik harus berganding bahu dan bekerjasama menjayakan kestabilan politik Umno.

Memang tepat pada masanya Perdana Menteri menyatakan perkara itu.

Jika ia berlarutan kepada Umno, parti itu akan menjadi semakin jumud atau menjadi semakin kecil.

Sekiranya ahli dan pemimpin dapat mengikut saranan Presiden dan berusaha serta bekerja memperjelaskan keadaan kepada ahli dan masyarakat, saya yakin Umno dapat dipulihkan dan kembali kepada zaman kegemilangan pada 1995.

Kemas menjalankan kegiatan kemasyarakatan dan memberi penjelasan serta penerangan kepada ahli Umno dan masyarakat.

Malangnya ramai yang terpengaruh dan lebih minat kepada dakwah dan fitnah pembangkang.

Oleh itu, tindakan Kemas nampak kurang berkesan. Pembangkang juga mengakui dalam majalah dan ceramahnya dengan menyatakan penghalang kejayaan mereka ialah:

1. Perdana Menteri.
2. Kuasa.
3. Wang.
4. Kemas.

Selain itu, keadaan Kemas Terengganu dikecam pembangkang apabila mereka berkuasa, jadi warga Kemas perlu menjadikan ini satu pengajaran.

Amanat Presiden supaya semua pihak bertanggungjawab menentukan kestabilan politik khasnya Umno hendaklah dipatuhi.

Oleh itu semua pihak perlu melakukan perubahan segera pada semua peringkat sehingga ke akar umbi.

Masyarakat sentiasa memerhati gerak laku dan tindakan Umno, sikap buruk segelintir ahli dan pemimpin yang suka bermuka-muka di depan menunjukkan sokongan tidak berbelah bagi tetapi lain pula di belakang.

Masyarakat dapat mengesan apa saja yang dilakukan pemimpin dan ahli sama ada baik atau buruknya.

Jika melakukan yang baik, maka keuntungan kepada Umno dan begitu juga sebaliknya.

Oleh itu, jika ahli dan pemimpin sayangkan Umno kita semua patut mengikut amanat Presiden dan dapat memainkan peranan penting dan berkerja dengan ikhlas tanpa mengharapkan pulangan atau keuntungan, demi membantu memantapkan kegemilangan Umno dan Melayu khasnya.